

दिनांक 29.03.2024

समय: 18.45 बजे

- लोकसभा चुणाव रा पैला चरण मांय नाम पाछा लेवण रो काले आखिरी दिन— सिंज्यां तांई चुणावी मैदान री तस्वीर व्हेला साफ।
- प्रदेश मांय स्वीप गतिविधियां रे तैत आज ई केई कार्यक्रम व्ह्या।
- सरकारी ई-मार्केट पोर्टल, जेएम माथे चालता रोकड बरस मांय चार लाख करोड रुप्यां रो रिर्कोर्ड करोबार— लारला साल री तुलना मांय 205 फीसदी री बढबार।
- गुडफ्राइडे माथे आज गिरिजाघरां मांय खास प्रार्थना सभावां—राजस्थान दिवस माथे काले व्हेला केई कार्यक्रम।

000

प्रदेश मांय लोकसभा रा 19 अप्रैल ने होवण वाळा पैला चरण रा चुणाव सारू नामपाना पाछा लेवण री काले आखिरी तारीख है। काले सिंज्या ई चरण सारू चुणावी मैदान री स्थिति साफ व्हे जायेला। अजै तांई प्रदेश मांय दो उम्मीदवारां आप रा नाम पाछा लिया है। दोन्यु उम्मीदवार जयपुर ग्रामीण सीट माथे नामपानो भर्यो हो। वटे ई 8 उम्मीदवारां रा पर्चा चुणाव आयोग खारिज कर दिया है। ई बीचे दूजा चरण रा चुणाव सारू आज तीन उम्मीदवारां आप रा नामपाना भर्या। अजमेर ऊं कांग्रेस पार्टी रा उम्मीदवार रामचन्द्र चौधरी नामपाना रा चार सेट भर्या है। प्रदेश री 25 लोकसभा सीटां सारू 2 चरण मांय वोट पडेला। पैला चरण मांय जयपुर समेत 12 चुणाव हलकां मांय 19 अप्रैल ने वोट पडेला जद के दूजा चरण मांय 13 लोकसभा सीटां सारू 26 अप्रैल ने वोट पडेला। वोटों री गिणती चार जून ने करी जायेला।

000

राज्य मांय 100 फीसदी वोट सारू चलायी जाय री स्वीप गतिविधियां रे तैत आज ई केई ठोड़ां कार्यक्रम व्ह्या। हनुमानगढ़ मांय मतदाता जागरूकता शिविर लगायी ज्यो। ई दौरान पढेसरा वोट देवण रो संदेश देवता नाटक ई खेल्यो। वटे ई मूकबधिर अर अंध विद्यालय रा पढेसरां Me Hkkjr gj** गीत माथे प्रस्तुति दी। ई दौरान लोगां ने वोट देवण सारू शपथ दिरायी ज्यी। बाडमेर रा आदर्श स्टेडियम मांय मतदाता जागरूकता शपथ कार्यक्रम व्हयो। भीलवाड़ा मांय जागरूकता रैली निकाली ज्यी। वटे ई जोधपुर मांय ई महिलावां लोकतंत्र रा महापर्व मांय बत्ती ऊं बत्ती भागीदारी निभावण रो संकल्प लियो। अठीने झालावाड़ मांय चुणाव ने देखता जिला थर माथे व्यय अनुवीक्षण प्रभारियां री बैठक व्ही। इण मांय चुणाव मेहकमां रा अहलकारां ने उम्मीदवारां रा खर्चा रा बारा मांय जाणकारी दीरीजी। सांचौर रा भीनमाल, सरनाउ, पंचायत समिति री केई ग्राम पंचायतां मांय आज स्वीप गतिविधियां रे तैत गांव वाळा मांय जाग जगायी ज्यी।

000

निर्वाचन आयोग प्रदेश मांय लोकसभा आम चुनाव रे मतदान दिवस माथे सार्वजनिक छुट्टी ऐलाण करी है। मुख्य चुणाव अहलकार प्रवीण गुप्ता बतायों की पैला चरण मांय 19 अप्रैल अर दूजा चरण मांय 26 अप्रैल ने वोट पडण वाळा चुणाव हलकां मांय पगार रे साथे छुट्टी रेवेला अर वोट पडण रो दिन सूखा दिवस रहवेला। ई बीचे चुणाव मेहकमो पैला चरण री एकीकृत मतदाता सूची छाप दी है। 12 लोकसभा हलकां मांय अढाई करोड ऊं बत्ती मतदाता आप रो वोट दे सकेला। इण मांय 304 थर्ड जेण्डर रा मतदाता ई भेळा है। इण रे अलावा कोई आठ लाख नुवा वोट देवण वाळां ई आप रो पैलो वोट दे सकेला। सब ऊं बत्ती 22 लाख 87 हजार वोट जयपुर मांय अर सब ऊं कम 19 लाख वोट दौसा लोकसभा सीट माथे पडेला। श्री गुप्ता बतायो के पैला चरण रा वोट सारू कुल 24 हजार 370 पोलिंग बूथ बणायी ज्यो है।

000

चुणाव आयोग रो lh foft y ,li मतदातावां मांय चावो व्हे रियो है। आम चुनाव रा ऐलाण पछे अजै तांई इण माथे 79 हजार ऊं बत्ती शिकायतां आचार संहिता री खिलाफवर्जी री दर्ज करी ज्यी है। चुणाव आयोग एक बयान मांय कह्यो है के 99 फीसदी ऊं बत्ती शिकायतां रो निपटरो कर दीरीज्यो है अर आं शिकायतां मांय ऊं 89 फीसदी रो निपटरो सौ मिनट रा बगत मांय करी ज्यो है। ई ऐप माथे 58 हजार पांच सौ ऊं बत्ती शिकायतां गैर कानूनी होर्डिंग अर बैनर रा बारा मांय मिली है, जद के चौदह सौ ऊं बत्ती फरियादां रकम, निजराना अर शराब बांटण रा बारा मांय है। ध्यानजोग है के सी-विजिल एप खास तौर ऊं लोगां ने आदर्श आचार संहिता री खिलाफवर्जी रा मामलां री शिकायत चुणाव आयोग ने सीधी पहुंचावण रो हक देवे है।

000

आम चुनाव ऊं पैला प्रदेश मांय गैर कानूनी गतिविधियां माथे नकेल कसण सारू आं दिनां खास अभियान चलायो जावे। ई कडी मांय आज निगरानी दल नागौर रा नावां कने एक कार ऊं साढे पैंतालीस किलो डोडा पोस्त बरामद कर्यो।

ई बारा मांय लक्ष्मणगढ रा रेवणियां कार चालक ने गिरफ्तार करी ज्या है।

डूंगरपुर जिला री बिछीवाड़ा मांय चुणाव मेहकमां री टीम रतनपुर बोर्डर माथे एक गाड़ी ऊं गैर कानूनी ले जाई जाय री 10 किलो चांदी जब्त करी है।

000

लोकसभा चुनाव मांय वोट देवण बाबत् जाग जगावण सारू आकाशवाणी समाचार जयपुर री ओर ऊं संदेश श्रृंखला चलायी जा रही है। आप संदेश रिकॉर्ड कर र या टाइप कर र म्हाणा व्हॉट्सअप नम्बर 94140-52368 माथे भेज सको हो। चुणी ज्या संदेश म्हाणा न्यारा-न्यारा समाचार बुलेटिन मांय भेळा कर्या जावेला। आज पेश है बाडमेर जिला रा श्रोता रो संदेश -

000

सरकारी ई-मार्केट केन्द्र जेएम माथे चालता रोकड बरस मांय रिकॉर्ड चार लाख करोड रुप्यां रो सकल कारोबार व्ह्यो है। ओ लारला रोकड बरस री तुलणा मांय दोगुनो है। आज नुवी दिल्ली मांय जेएम रा सीईओ पी.के सिंह खबरनवीसां ने बतायो के इण ऊं पोर्टल रा अनूठा डिजिटल बूता अर कार्य खमतां रो पतो चाले है। इण ऊं ओ तैय है के सार्वजनिक खरीद मांय बत्ती हुनर, साफ गोई अर बिना किणी अडचन रे करोबार होवे है। वणा कह्यो के ई सकल कारोबार मांय कोई पचास फीसदी योगदान, सेवावां री खरीद रो है। लारला रोकड बरस मांय जेएम माथे सेवावां री खरीद इण साल 205 फीसदी बधी है।

000

गुड फ्राइडे माथे आज प्रदेशभर रा गिरजाघरां मांय खास प्रार्थना सभावां आयोजित व्ही। ईसाई समुदाय मांय आज रो खास महतव मान्यो जावे। यीशु मसीह ने इणी दिन सूळी माथे चढायी ज्या हा। गुड फ्राइडे ने होली फ्राइडे, ग्रेट फ्राइडे, ब्लैक फ्राइडे अर ईस्टर फ्राइडे रा नाम ऊं ई जाण्यो जावे। ईसाई समुदाय रा लोग मानव कल्याण मांय प्रभु यीशु रा बलिदान ने याद कर्या। टोंक मांय ई मौके खास आयोजन व्ह्या। सर्वाईमाधोपुर मांय ई गिरजाघरां मांय विशेष सभावां राख्यी ज्यी। अजमेर रा चर्चा मांय ई संवारा ऊं ई लोग मोमबत्ती जगा र दुनियां रा कल्याण सारू प्रार्थना करी ज्यी। राजधानी जयपुर रा गिरजाघरां मांय भेळी प्रार्थना सभावां व्ही। दो दिन रे पछे आवण वाळा दीतवार ने यीशु मसीह ने पाछा जीवत होवण माथे ईस्टर रा त्यौहार ने ले र ई ईसाइ धर्मात्मियां मांय उमाव देख्यो जावे।

000

राजस्थान प्रदेश काले आप री थापना री 75 वीं सालगिरे मनावेलां। 30 मार्च 1949 ने जयपुर, जोधपुर, बीकानेर अर जैसलमेर रियासतां, लोकतंत्र मांय आस्था जतावता वृहद राजस्थान मांय भेळी व्ही ही। राज्यपाल कलराज मिश्र प्रदेशवासियां ने राजस्थान दिवस री शुभकामनावां दी है। आप रा संदेश मांय राज्यपाल कह्यो के राजस्थान नाम ई मन मांय मान जगावण वाळो है। वणा कह्यो के प्रदेश रा कण-कण मांय त्याग, तपस्या अर बलिदान री गाथावां भेळी है। श्री मिश्र कह्यो के राजस्थान थापना दिवस फगत एक दिन नी है बल्कि ओ सदभाव री आपा री संस्कृति ने सहेजण रो दिन है। मुख्यमंत्री भजन लाल शर्मा ई राजस्थान दिवस री बधाई देवता अठे री सांस्कृतिक विरासत अर समृद्ध परम्परावां ने अखण्डित बणायी राखण सारू प्रदेशवासियां ऊं अरज करी है। प्रदेश रा न्यारा-न्यारा जिलां मांय राजस्थान दिवस माथे कार्यक्रम व्हेला। जोधपुर मांय ई जिला प्रशासन अर सैलाणी मेहकमां कानी ऊं कार्यक्रम राख्यी ज्या है। शहर रा मेहरानगढ किला, जसवंत थडा अर उम्मेदभवन समेत सरकारी संग्रालयां मांय लोक कलाकार प्रस्तुति देवेला।

बूंदी मांय सैलाणी मेहकमां कानी ऊं न्यारा-न्यारा कार्यक्रम कर्या जायेला। म्हाणा बूंदी खबरनवीस बतायो के कार्यक्रममां री सरुआत 84 खम्भां री छतरी आ व्हेला।

000

आज कैसर निदान दिवस रे मौके ई बीमारी रे प्रति जागजगावण सारू कार्यक्रम व्ह्यो। आज रो दिन वां लोगां ने समर्पित होवे है, जिण इण बीमारी ऊं डट ने मुकाबलो करता जीत हासिल करी है। जयपुर मांय ई मौके भगवान महावीर कैसर अस्पताल कानी ऊं कार्यक्रम व्ह्यो। कार्यक्रम मांय राज्यपाल कलराज मिश्र कैसर रोग रा ईलाज सारू असर दार कोशिश करण अर सरुआती पिछाण सारू अभियान चलावण री अरज करी। राज्यपाल कह्यो कैसर माथे जीत हासिल करण वाळां रा अनुभव ऊं जुडी कामयाबी री कहानियां ने बत्ती ऊं बत्ती प्रचार करी जावणी चाहिजे। जिण ऊं दूजां मरीजां ने ई हिम्मत मिल सके। ई मौके न्यारी-न्यारी ठौड़ां ऊं आया कैसर विजेतावां आप रा अनुभव साझा कर्या।

केन्द्र सरकार गेहूं रा भंडारण ने जरूरी ऐलाण करण रो हुकम दियो है। खाद्य और सार्वजनिक वितरण मंत्रालय कह्यो है के सगळा राज्या अर केन्द्र शासित प्रदेशां मांय करोबारियां अर अर थोक खुदरा बेचण वाळां ने एक अप्रैल ऊं आवता हुकम ताई गेहूं रा आप रा भंडारण ने ऐलाण करणो व्हेला। देश मांय भेळी खाद्य सुरक्षा रा प्रबंधन करण अर जमाखोरी अर सट्टाबाजी ने रोकण सारू ओ फैसलो करी ज्यो है। ध्यानजोग है की चावळ भंडारण रा ऐलाण पैला ऊं ई लागू है।